

NÜXÏRAÜXÜ GA POPERA GA PEDRU ÜMATÜXÜ

Pedru nüxü narümoxe ga yema yaxõgüxü ga to ga nachiuãnegu woonexü

¹ Pa Chaueneëgüx, choma i Pedru nixi i pexcex chanaxumatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxücex i norü ore. Rü pexcex chanaxumatü i pema na perü naãnena to i nachiuãnegügu penawoonexü i Põtuanewa rü Gárataanewa rü Capadochiaanewa rü Áchiaanewa rü Bitiniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümamaxüchima nagu naxñnuxü. Rü nanamu ga Naãe i Üünexü na pexü yamexëëgüxücex na aixcüma napëxewa pixüünegüxücex rü Ngechuchu ya Cristuga na pexinüëxücex rü nagümaã na piyauxgüxücex na nataxuxücex i perü chixexügü. Rü chanaxwëxe i Tanatü ya Tupana poraãcü pexü narüngüxëë rü pexü nataãëxëë.

Ítananguxëë na wena tá imaxëxü

³ ¡Rü ngixã nüxü ticuëxüügü ya Tupana ya tórü Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tuxna nanaxã ga maxü ga yexwacaxüxü, yerü poraãcü nüxü tangechaütümüügü. Rü ngëmacex i ñuxma i

yixema rü ta ítananguxẽẽ na wena tá imaxẽxũ. ⁴ Rü pema rü wüxi i ngunexũgu rü aixcüma tá penayauxgü i guxũma i ngẽma mexũgü i Tupana tá pexna ãxũ i ñuxma daxũguxũ i naãnegu pexũ namaã nanguxũxũ. Rü ngẽma tá pexna naxãxũ rü tagutáma inayarũxo, rü tagutáma naxãũãchi, rü tagutáma nangau. ⁵ Rü ñuxma na Tupanaãxũ peyaxõgũxũ rü nüma rü norü poramaã tá pexna nadau ñuxmatáta aixcüma penayauxgü i ngẽma maxũ i taguma gúxũ i tá pexna naxãxũ i ngẽxguma naguxgu i naãne. ⁶ Rü ngẽmacèx name nixĩ i poraãcü petaãẽgü, rü nüetama nixĩ ega woo ñuxma ñãã perü maxũwa rü paxaxãchi muxũma i guxchaxũgü pexũ üpetügu. ⁷ Erü ngẽmaãcü nixĩ i pexũ naxũxũ ya Tupana na nüxũ nacuáxũcèx rü ngoxi aixcüma peyaxõgü rü êxna tama. Rü ngẽxguma peyaxõgüamagu ega woo guxchaxũgü pexcèx ínguxgu, rü ngẽma perü õ rü wüxi i uiruarü yexera nixĩ na namexũ erü ngẽma uiru rü woo namexẽchi natürü düxwa nangau. Rü ngẽma uiru rü üxümaã nüxũ taxü na nüxũ icuáxũcèx rü ngoxi aixcüma uiruxüchi yĩxũ. Rü ngẽxgumarüü ta nixĩ i perü õ na guxchaxũgümaã Tupana nüxũ üxũ na nüxũ nacuáxũcèx rü ngoxi aixcüma nüxũ peyaxõgü na yixcama pexũ yacuèxüxũcèx rü mexũ i pechica pexna naxãxũcèx rü pemaã nataãẽxũcèx i ngẽxguma wena núma naxũxgu ya Ngechuchu ya Cristu. ⁸⁻⁹ Pema rü Ngechuchu ya Cristuxũ pengechaũgü woo taguma nüxũ na pedaügũxũ. Rü ñuxma rü ta woo tama nüxũ pedaügü, natürü nüxũ peyaxõgü, rü poraãcü petaãẽgü. Rü ngẽma perü taãẽmaã rü taxuacüma nüxũ pixuéga na

ñuxãcü petaãëgüxüchixü, erü marü penayauxgü i perü maxü i taguma gúxü. Rü ngëmacèx nixí i nüxü peyaxôgüxü. ¹⁰ Rü nuxcümaxüchima ga Tupanaârü orearü uruüğü, rü nüxü nixugüe ga na ñuxãcü tá Tupana pexü narüngüxëëxü. Rü nümagü rü poraãcü nangúe rü naxcèx nadaugü i ngëma maxü i taguma gúxü. ¹¹ Rü nümagü ga yema orearü uruüğü rü Tupanaârü poperawa nangúe na nüxü nacuèxgüxüçèx na ñuxãcü tá na yïxü rü ñuxguacü tá na nangóxü ga guma Maxëxëëruü ga Cristu. Rü Cristuãë i Üünexü ga yema orearü uruüğüwa yexmaxü, rü nüxü nüxü nacuèxëë ga na Cristu rü tá ngúxü yangexü rü tá nayuxü rü yixcama rü wena tá na namaxüxü rü ñuxüchi daxügüxü i nañnewa tá na naxüxü na guxüârü ãëxgacü yïxüçèx. ¹² Natürü Tupana rü yema nuxcümaügüxü ga orearü uruüğüxü nüxü nacuèxëë na tãütáma nümagü nüxü nadaugüxü ga guma Maxëxëëruü ga naxcèx nadaugücü, natürü pema tá yïxü na nüxü pedaugüxü. Rü dücax, Pa Chaueneëgüx, gumatama Maxëxëëruüchiga nixí ga perü orearü uruüğü pemaã nüxü ixugügüxü ga yexguma Tupanaãë i Üünexü ga daxüwa ne muxü yadexagüxëëgu. Rü guxüma i ngëma ore i yima Maxëxëëruüchiga, rü woo Tupanaârü orearü ngeruüğü i daxüçüãx rü nüxü nangúchaüğü na yexeraãcü nüxü nacuèxgüxü.

*Tupana rü taxcèx naca na napëxewa
naxüünexüçèx i tórü maxü*

¹³ Rü ñuxma na Cristuarü duüxüğü pixïgüxü, rü penaxwèxe na pexuãëgüxü rü ípememarexü na penaxüxü i norü ngúchaü. Rü name nixí i aixcüma

meã ípenanguxẽẽ i guxũma i ngẽma mexũgũ i Tupana tá pexna áxũ i ngẽxguma Ngechuchu ya Cristu núma ũxgu. ¹⁴ Rũ ñuxma na Tupanaxãcũgũ pixĩgũxũ, rũ penaxwẽxe na aixcũma naga pexĩnũẽxũ. Rũ tama name i nagu pexĩ ga yema nuxcũmaũxũ ga perũ ngúchaũ ga ũpa nagu pexĩxũ ga yexguma tauta Tupanaxũ pecuẽxgu. ¹⁵ Natürũ penaxwẽxe i aixcũma meã pemaxẽ na Tupanapẽxewa naxüünexũcèx i perũ maxũ. Erũ nüma ya Tupana ya pexũ decü, rũ naxüüne. ¹⁶ Rũ norũ ore i ümatũxũwa rũ ñanagürũ:

“Chanaxwẽxe i chauxrũũ pixüüne, erũ choma rũ chaxüüne”,

ñanagürũ. ¹⁷ Rũ pema na “Pa Tonatũx” ñapegũxũ nüxũ ya Tupana, rũ ñuxma na ñoma i naãnewa pemaxẽxũ rũ name nixĩ i guxũguma nüxũ pemuũẽ. Erũ nüma rũ aixcũmaxũchi nanangugũ i wüxichigũ i duũxũgüarũ maxũ na ñuxãcü yiixũ. Rũ tüxũ napoxcu ya guxãma ya texé ya chixexũ ügũxe, rũ nüetama nixĩ ega woo texé tixĩgu, erũ napẽxewa rũ nawüxigumare i guxũma i duũxũgũ. ¹⁸⁻¹⁹ Rũ Tupana rũ marũ pexũ ínanguxũxẽẽ nawa ga yema nuxcũmaũxũ ga perũ maxũ ga taxuwama mexũ ga perũ oxigũxũtawa peyaxuxũ. Rũ yema na nawa pexũ ínanguxũxẽẽxũcèx rũ pexna naxããxũcèx i maxũ i ngexwacaxũxũ, rũ poraãcü nüxũ naxãtanü. Yerũ tama uiru rũ êxna dïeru i ngauxwèxexũmaã nanaxütanü, natürũ Cristugũ ya mexẽchicũmaã nixĩ ga naxütanüãxũ. Yerũ nüma ga Cristu rũ ñoma wüxi i carneru i taxuwama nañuxraũxũ i Tupanacèx imáxürũũ pexcèx nayu na pexũ naxütanüxũcèx. ²⁰ Rũ nüma ga Tupana rũ woetama nuxcũmaxũchima tauta naãne íxügũgu,

rü marü Cristuxũ naxuneta na pexcèx nayuxüçèx. Natürü ñomaüçüü nixĩ ga nangóxũ ga guma Cristu na pexũ nangüxẽẽxüçèx. ²¹ Rü ñuxma rü Cristu-gagu nixĩ i nüxũ peyaxõgüxũ ya Tupana ga yuwa Cristuxũ írüdaxẽẽcü rü daxüwa nagacü. Rü ngẽmacèx nixĩ i ñuxma i Tupanaãxũ peyaxõgüxũ rü ípenanguxẽẽgüxũ na daxüwa pexũ nagagüxüçèx. ²² Rü ñuxma na naga pexĩnüẽxũ i Tupanaãrü ore i aixcüma ixĩxũ rü pexũ natauxcha na pegü pengechaügüxũ erü Tupana rü marü pexũ inayanaxoxẽẽ i perü chixexügü. Rü ngẽmacèx penaxwèxe i aixcüma guxũ i perü ngüchaümaã pegü pengechaügü. ²³ Rü ñuxma i pema rü marü penayauxgü i ngexwacaxüxũ i perü maxũ. Rü ngẽmacèx ñoma ngexwacèx pebuxürüü pixĩgü. Natürü ngẽma maxũ rü tama penatü rü pee ya yuwèxéxewa nixĩ i penayaxuxũ. Natürü Tupanaãrü ore i maxüxũ i taguma iyarüxoxüwa nixĩ i penayaxuxũ. ²⁴ Erü Tupanaãrü ore i ümatüxüwa rü ñanagürü:

“Guxüma i duüxügü rü ñoma wüxi i natüanerüümare nixĩ. Rü guxüma i norü mexũ, rü wüxi i nanetüchacurüümare nixĩ. Rü ngẽma natüane rü nayu, rü nachacu rü narüngu. Rü ngẽxgumarüü ta nixĩ i duüxügü na tama nataixũ i norü maxũ i ñoma i naãnewa. ²⁵ Natürü tórü Coriarü ore rü taguma inayarüxo”,

ñanagürü i Tupanaãrü orewa. Rü ngẽma Tupanaãrü ore i mexũ nixĩ ga pemaã nüxũ yaxugüxũ.

2

1 Rũ ngẽmacèx name nixĩ i nũxũ perũxoe i guxũma i chixexũgũ, rũ ngẽma na pidoratèxgũxũ, rũ ngẽma na togũpẽxewa meã na pemaxẽnetaxũ rũ ngẽma na pixãũxãchiwèxegũxũ, rũ ngẽma na pex-oregütèèxgũxũ. ²⁻³ Rũ ngẽxguma chi aixcũma nũxũ picuèxãchitanũgu na ñuxãcü namecũmaxũchixũ ya tórũ Cori, rũ ñoma wũxi i õxchana i ngexwacèx buxũ i naẽgũnenixũ nũxũ ngúchaũxũrũũ penaxwèxe i poraãcü pexũ nangúchaũ i norũ ore na ngẽmawa peporaexũcèx rũ meã peyaexũcèx i perũ õwa na ngẽmaãcü guxũwama namexũcèx i perũ maxũ i taguma gúxũ.

Cristu nixĩ ya nuta ya maxũcü

4 Rũ ñuxma rũ name nixĩ i tórũ Corina pengaicamagũ. Erũ nũma ya tórũ Cori nixĩ ya yima nuta ya maxũcü ya Tupana nayaxucũ na namaã inaxũgũãxũcèx ya napata. Rũ woo duũxũgũ nũxũ oexũ, natürũ yima nixĩ ya Tupana nayaxucũ erũ naxcèx rũ namexẽchi. ⁵ Rũ ngẽxgumarũũ ta i pemax, rũ Tupana pexũ nade na napataarũ nutagũ ya maxẽcü pixĩgũxũcèx. Rũ pema nixĩ i Tupanaãrũ ngũxẽẽruũgũ i üünexũ i Ngechuchu ya Cristuégagu Tupanana ãmare pexãgũxũ. Rũ ngẽma ãmare i nũxna pexãgũxũ i namaã nataãẽxũ rũ ngema nixĩ i perũ maxũ i mexũ i napẽxewa. ⁶ Rũ Tupana rũ norũ ore i ümatũxũwa rũ Cristuchigaxũ nixu rũ ñanagürũ:

“Ñuxma na ichanaxũgũxũ ya chopata, rũ yima nuta ya nũxĩra chayaxũcuchicũ, rũ yima nixĩ ya nuta ya mexẽchicũ ya chomatama chanayaxucũ na chopata

namaã ichaxügüxüçèx. Rù yima nuta rù chaunechiga nixĩ. Rù yíxema nüxü yaxõxê, rù aixcüma tá tanayaxu i ngẽma maxü i taguma gúxü i tümamaã ichaxunetaxü”,

ñanagürü. ⁷ Rù pema na nüxü peyaxõgüxü, rù Cristu rù pexcèx rù guxüwama name rù naporaxüchi. Natürü ngẽma tama yaxõgüxüçèx, rù taxuwama name. Rù ngẽmacèx ya Tupana rù norü ore i ümatüxüwa rù ñanagürü:

“Yima nuta ya ïpataarü üruügü nüxü ocü, rù chauxcèx rù gucü ya nutaarü yexera namexêchi. Rù ngẽmacèx yimaetüwa nixĩ ichanaxügüxü ya chopata”,

ñanagürü. ⁸ Rù Tupanaärü ore rù ñanagürü ta:

“Guxüma i ngẽma tama yaxõgüxü rù tama irüxĩnüêchaüxü rù yima nutagu tá nayarüpucutügü”,

ñanagürü. Rù ngẽmaãcü i guxüma i ngẽma tama yaxõgüxü rù tá chixexügu nayi erü tama Tupanaga naxĩnüêchaü rù tama Cristuaxü nayaxõgüchaü. Rù ngẽmacèx Tupana tá nanapoxcue yema nüma nüxü yaxuxürüü.

⁹ Natürü pema nixĩ i duüxügü i tórü ãëxgacü ya Tupana pexü dexü na norü ngüxêëruügü pixigüxüçèx. Rù pema nixĩ i duüxügü i napêxewa ixüünexü erü nümatama ya Tupana rù norü duüxügüxü pexü nixigüxêë na nüxü pixuxüçèx i norü ore i aixcüma mexêchixü. Rù nümatama ya Tupana nixĩ ga chixexüwa pexü ïnanguxüxêëxü na norü ngóonexü i mexêchixügu pechocuxüçèx.

¹⁰ Rù üpa ga pema rù tama Tupanaärü duüxügü pixigü, natürü i ñuxma rù aixcüma norü duüxügü pixigü. Rù üpa rù

taxúeaxüma pengechaütümüügü, natürü i ñuxma rü Tupanaãxü pengechaütümüügü.

Ñuxma na Tupanaãrü duïxügü pixïgüxü, rü name nixï i meã naxcèx pemaxë

¹¹ Pa Chaueneëgü ya Pexü Changechaügüxex, rü ñuxma na Tupanaãrü duïxügü pixïgüxü, rü tama ñoma i naãnecüãx pixïgü. Rü ngëmacèx pexü chacèèxü na nüxü perüxoexüçèx i guxüma i ngëma ngúchaügü i chixexü i ñoma i naãnecüãx nagu ïxü. Erü ngëma ngúchaügü i chixexü rü taãèxü chixexügu nanguxëèchaü. ¹² Rü name nixï i meã pemaxë napëxewa i ngëma duïxügü i tama Tupanaxü cuèxgüxü. Rü ngëxguma woo poraãcü chixri pechiga yadexagügu i nümagü, rü tá nüxü nadaugü na ñuxãcü mexü pexügüxü, rü tá Tupanaxü nicuèxüügü i ngëxguma Cristu wena núma üxgu. ¹³ Rü name nixï na tórü Cori ya Ngechuchugagu tümaga pexïnüèxü ya guxãma ya yixema perü ãëxgacügü ixïgüxe. Rü ngëmaãcü name nixï i meã naga pexïnüè ya ãëxgacü ya tacü ya Dumawa ngëxmacü, erü núma nixï i guxü i togü i ãëxgacügüétüwa nangëxmaxü. ¹⁴ Rü ngëxgumarüü ta name nixï i naga pexïnüè i ngëma togü i ãëxgacügü i petanüwa namugüxü ya yima ãëxgacü ya tacü na napoxcueãxüçèx i ngëma chixexü ügüxü rü namaã nataãëgüxüçèx i ngëma mexü ügüxü. ¹⁵ Erü Tupana nanaxwèxe na mexü pexügüxü na ngëmaãcü ipeyanangeëxgüxëèxüçèx i ngëma duïxügü i tama Tupanaãrü orexü cuáxchaügüxü rü chixri ngëma orchiga idexagüxü. ¹⁶ Rü ñuxma na Cristu pexü ínguxüxëèxü, rü name nixï i

duũxügü i aixcüma ínguxũxürüũãcü meã pemaxẽ. Natürü ñuxma na ípenguxũxũ rü tama name na ngẽmamaã pegü ípepoxũxũ na tacü rü chixexũ pexügüxũcèx. Erü ñuxma na Tupanaãrü duũxügü pixígüxũ, rü name nixĩ i norü ngúchaũxĩcatama pexügü. ¹⁷ Rü name nixĩ i meã penayauxgü i guxũma i duũxügü. ¡Rü nüxũ pengechaũ i taeneẽgü i yaxõgüxũ! ¡Rü nüxũ pemuũẽ ya Tupana! ¡Rü naga pexĩnüẽ ya ãẽxgacü ya tacü ya Dumacũãx!

Tanaxwèxe i Cristurüũ yaxna namaã taxĩnüẽ i ngẽxguma ngúxũ ingegügu

¹⁸ Pa Duũxügü i Coriãxgüxũx, ¡rü nüxũ pengechaũgü rü naga pexĩnüẽ i perü corigü! Rü tama name i ngẽma perü corigü i pemaã mecümaxũxũxĩcatama pengechaũgü, natürü name nixĩ i nüxũ pengechaũgü ta i ngẽma perü corigü i chixecümaxũ. ¹⁹ Erü Tupana rü pemaã nataãẽ ega nüxũ na pengechaũgüxũcèx yaxna namaã pexĩnüẽgu i ngẽxguma texé natücèxmamare chixexũ pemaã üxgu rü ngúxũ pexũ tingexẽẽgu. ²⁰ Natürü çtacüwa pexũ namexũ ega yaxna namaã pexĩnüẽgu i ngẽxguma wüxi i perü chixexũcèx pepoxcuegu? Natürü ngẽxguma tacü rü mexũ i pexüxügagu ngúxũ pingegügu rü yaxna namaã pexĩnüẽgu, rü ngẽma waxi nixĩ i Tupanapẽxewa mexũ. ²¹ Rü ngẽma na mexũ pexüxügagu ngúxũ pingegüxũcèx nixĩ i Tupana pexũ dexũ. Yerü ga Cristu rü ta pexcèx ngúxũ ninge. Rü yemaãcü pexũ nüxũ nadauxẽẽ na ñuxãcü nüma nanaxwèxexũ na naxrüũ yaxna namaã pexĩnüẽxũ i ngẽma ngúxũ. ²² Nüma ga Cristu rü taguma pecadu naxü, rü

taguma texéxũ nawomüxêê. ²³ Rũ yexguma duũxũgũ chixexũ namaã ixugüegu, rũ nüma rũ taxuũma ga chixexũmaã nanangãxũ. Rũ yexguma ngúxũ nüxũ yangexêêgügu, rũ nüma rũ tama tacü rũ chixexũmaã nanaxãuxũne. Natürü Tupanamaã nüxũ nixu na nüma namaã namexêêãxücèx ga yema duũxũgũ ga chixri namaã chopetüxũ. Yerü nüxũ nacuèx rũ Tupana rũ aixcüma meã nanangugü i guxũma i duũxũgüarü maxũ. ²⁴ Rũ nümatama ga Cristu rũ nügüxũnegu nayange ga tórü pecadugü ga yexguma curuchagu nayuxgu. Rũ yemaãcü nanaxü na nüxũ rüxoexüçèx i tórü chixexũ na naxcèxicatama imaxèxüçèx. Nüma rũ pexcèx nanapix na yemaãcü pexũ nameẽxêẽxüçèx. ²⁵ Rũ pema ga ũpa rũ ñoma carnerugü i nu ne naxĩmarexürüũ pixĩgü. Natürü i ñuxma rũ marü Cristucèx pewoegu. Rũ nüma nixĩ i perü dauruũ yĩxũ, rũ nüma nixĩ i pexna nadauxũ.

3

Ñuxãcü Tupana nanaxwèxe na namaxèxũ i ngẽma ixãmaxũ rü ixãtexũ

¹⁻² Rũ pemax, Pa Ngexũgüx, rũ name nixĩ i petega pexĩnüê na ngẽma pete i tama yaxõxũ nüxũ dauxüçèx i perü maxũ i mexũ i Tupanapèxewa rũ duũxũgüpèxewa rũ ngẽmacèx na yaxõõxüçèx woo taxuũma i Tupanaarü orexũ namaã pixugu. ³ Rũ ngẽma na aixcüma pimexüçèx, rũ tama name i nagu perüxĩnüê na ñuxãcü pegü pemexêẽyaexüchixũ, rũ êxna uirunaxcèx i ngèxãèruũmaã pengèxãègüxũ, rũ êxna tatanüxüchixũ i naxchirugu na

picuxgüxü. ⁴ Natürü name nixĩ i perü maxüwa pegü pimexẽëgü rü guxüma i duüxügümaã pimecümagü rü taguma texémaã penuãëgü, erü ngẽma nixĩ i perü mexü i taguma iyarüxoxü i aixcüma mexü i Tupanapëxewa. ⁵ Rü yemaãcü norü maxü i mexümaã nixĩ ga nügü yangèãëgüxü ga yema nuxcümaügüxü ga ngexügü ga Tupanapëxewa ixüünexü. Rü nümagü rü Tupanaãxü nayaxögü rü natega naxĩnüë. ⁶ Rü yemaãcü ta iyixĩ ga Chara ga ngĩte ga Abráüga na naxĩnüxü, rü ngĩrü corimaã naxuaxü. Rü pemagü rü tá ta ngĩrüü pixĩgü ega mexü pexügügu. Rü ñuxüchi taxucèxtáma tüxcüü petecèx pemuüë. ⁷ Rü ngëxgumarüü ta i pemax, Pa Yatügüx, rü name nixĩ i meã pemèxü pengechaügü rü aixcüma yaxna ngĩmaã pexĩnüë, erü ngĩma rü irüturamaë. Rü name nixĩ i ngĩmaã petaãëgü erü Tupana rü pexna naxããxürüü ngĩxna nanaxã i ngẽma maxü i taguma güxü. Rü name nixĩ i ngẽmaãcü meã ngĩmaã pemaxë na Tupana nüxü ñnüxücèx i perü yumüxëgü.

Yíxema mexü ügüxe ya ngüxü ingegüxechiga

⁸ Rü ngẽmaãcü chanaxwèxe i guxãma i pema rü pegüxü pengechaütümüügü rü wüxigu perüxĩnüë, rü aixcüma nüxü pengechaügü i guxüma i taeneëgü i yaxögüxü. Rü chanaxwèxe i aixcüma pemecümagü rü guxãmaã pegü pewüxiguxëë. ⁹ Rü ngëxguma texé chixexü pemaã üxgu, rü tama name i pema rü ta chixexü tümamaã pexü. Rü ngëxguma texé pemaã guxchigagu, rü tama name i pema rü ta tümamaã peguxchiga. Natürü narümemaë nixĩ i mexü i oremaã tüxü pengãxüga

rü tüxü perüngüxëë, erü Tupana pexü nadei na pexü nangüxëëxücèx. ¹⁰ Erü Tupanaärü ore i ümatüxüwa rü ñanagürü:

“Ngëxguma texé taãëãcüma maxchaügu, rü name nixi i nüxna tadau ya tümaärü conü na tama chixexü i oremaã yadeaxücèx. Rü ngëxgumarüü ta name nixi i nüxna tadau i tümaãx na tama doraxü yaxuxücèx. ¹¹ Rü name nixi i nüxna tayaxü i guxüma i chixexügu, rü mexü taxü. Rü ngëxgumarüü ta name nixi i guxüguma naxcèx tadau na togümaã tataãëxü. ¹² Erü törü Cori rü tüxna nadau ya yixema aixcüma ímexë, rü nüxü naxinü i tümaärü yumüxë. Natürü tümamaã nanu ya yixema chixexü ügüxe”,

ñanagürü i ngëma Tupanaärü ore. ¹³ ¿Rü texé tá chixexü pemaã üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxücèx ngüxü pingegügu, rü name nixi i petaãëgü. ¿Rü taxucèxma texéxü pemuë, rü taxucèxma tacücèx pexoegaãëgü! ¹⁵ Rü name nixi i perü Corixü peyaxixëë ya Cristu rü aixcüma naga pexinüë, rü guxüguma ípememare na meã penangãxüxücèx i guxüma i duüxügu i pexna çaxü na tüxcüü Cristuaxü peyaxögüxü. ¹⁶ Natürü name nixi i nüxü pengechaüãcüma penangãxü rü tama pegügu perüxinüëãcüma na norü yexera pixigüxü. Rü name nixi i meã pemaxë na taxucèxma pexoegaãëxücèx. Rü ngëxguma ngëmaãcü pemaxëgu rü tá naxãneë i ngëma duüxügu i chixri pechiga idexagüxü na ñuxãcü Cristucèx

pemaxêxũ. ¹⁷ Yixema rü ngúxũ tingegü ega chixexũ ixügügu. Natürü narümemaê nixĩ na mexũ ixügüxücèx ngúxũ na ingegüxũ, ega ngêmaãcü Tupana naxwèxegu. ¹⁸ Yerü nümatama ga Cristu rü ngúxũ ninge, rü wüxicanatama guxããrũ pecaducèx nayu. Rü woo na mecü yiĩxũ rü taxcèx nayu i yixema i chixexũ i duũxũgü ixĩgüxũ. Rü yemaãcü nanaxü na Tupanaxütawa tüxũ nagagüxücèx. Rü woo nayu ga naxũne, natürü ga naãê rü tama nayu. ¹⁹ Rü yexguma naxũne yuxgu rü naãê rü natanüwa naxũ ga yema naãêgü ga Tupana poxcuexũ, rü orexũ namaã nayarüxu. ²⁰ Rü yema naãêgü ga yexma poxcuexũ, rü yema nixĩ ga naãêgü ga yema duũxũgü ga Noe maxũgu tama ixĩnüêchaũxũ woo Tupana yaxna namaã naxĩnü ga yexguma Noe naxüyane ga guma wapuru. Rü 8 ga duũxũgüxicatama nixĩ ga guma wapurugu ichoũxũ, rü yema nixĩ ga guma mucü ga taxüchicüarũ dexáétüwa maxêxũ. ²¹ Rü yema dexá rü wüxi ga cuèxruũ nixĩ. Erü ngêxguma dexáwa íbaiegu, rü duũxũgüxũ nüxũ tacuèxêẽ na Ngechuchu ya Cristu wena maxũxũgagu yiĩxũ i tüxũ nangêxmaxũ i maxũ i taguma gúxũ. Rü tama taxüneãrũ düxétüwa na imexücèx nixĩ i íbaiecxũ, natürü ítabaie yerü marü Tupanana naxcèx taca na tüxũ iyanaxoxêẽãxücèx ga tórü pecadugü na aixcüma napêxewa imexücèx rü aixcüma mexũgu rüxĩnüêxücèx. ²² Rü nüma ga Ngechuchu ya Cristu, rü daxũguxũ i naãnewa naxũ, rü ñuxma rü Tupanaãrũ tügüncüwawa nangêxma. Rü ñuxma rü namêxwa nangêxmagü i guxüma i Tupanaãrũ orearü ngeruũgü i daxücüãx rü guxüma i ãêxgacügü i daxücüãx.

4

*Tanaxwèxe i ngẽma cuèx i Tupana tũxna ãxũmaã
nũxũ tarũngũxẽẽ i taeneẽgũ*

1-2 Rũ ngẽmacèx name nixĩ na ípememarexũ na ngúxũ pingegũxũ yexgumarũũ ga Cristu na ngúxũ yangexũ. Erũ yíxema ngúxũ ingexe rũ marũ nũxũ tarũxo i tũmaãrũ pecadu na guxũguma meã Tupana naxwèxexũãcũma tamaxũxúcèx, rũ tama i tũmaxũne naxwèxexũãcũma na tamaxũxúcèx. ³ Ūpa ga pemax, rũ mucũma ga taunecũ penaxũecha i ngẽma chixexũ i ñuxma i ngẽma duũxũgũ i tama Tupanaxũ cuèxgũxũ ũgũxũ. Rũ yexguma ga pema rũ pecadu pexũgũãcũma pemaxẽ, rũ penaxũ ga pexeneãrũ ngúchaũ, rũ pengãxẽ, rũ peta ga nawa pexãũgatanũxũ pexũgũ, rũ tacũ i nguchièxgũxũ poraãcũ pixaxcugũ, rũ tupanantachicũnèxãgũxũ picuèxũũgũ i woo Tupana na pexna nachuxuxũ i ngẽma. ⁴ Rũ yema duũxũgũ ga namaã pexãmũcũgũxũ ga yexguma chixri pemaxẽgu, rũ ñuxma rũ poraãcũ nagu narũxĩnũẽ na tacũcèx tama natanũgu pexãgũxũ rũ tama nawe perũxĩxũ i ngẽxguma norũ chixexũ naxũgũgu. Rũ ngẽmacèx nixĩ i ñuxma i chixri pechiga yadexagũxũ. ⁵ Natũrũ nũmagũ rũ tá ta Cristupèxewa nangugũ na namaã nũxũ yaxugũxúcèx na ñuxãcũ namaxẽxũ. Rũ nũma ya Cristu rũ ínamemare na nũxna yacachigũxúcèx i guxũma i duũxũgũ i maxẽxũ rũ yuexũ. ⁶ Rũ ngẽmacèx ya Tupana rũ naxũpa na nayuexũ i duũxũgũ rũ marũ nũxna nanaxuaxũ i maxũ i taguma gúxũ. Erũ nanaxwèxe na naxrũũ guxũguma mexũwa namaxẽẽchaxũ ega woo

ñoma i naãnewa nayuegu i naxũnegü. ⁷ Rũ marũ ningaica na nagũxũ i ñoma i naãne rũ guxũma i tacũ i nawa ngẽxmaxũ. Rũ ngẽmacèx name nixĩ na ípexuãèxũ rũ meã peãè ta ipexũgũxũ rũ guxũguma peyumũxègũxũ. ⁸ Rũ guxũãrũ yexera i ngẽma pexũ chanaxwèxexũ nixĩ na aixcũma pegũ pengechaũgũxũ i wũxichigũ. Erũ ngẽxguma aixcũma yigũ ingechaũgũgu rũ ngẽmaãcũ inayarũxo i muxũma i pecadugũ. ⁹ Rũ meã pegũ peyauxgũ i wũxichigũ i pechiũwa! Rũ tama name i tümamaã penuãèãcũma tũxũ peyaxu. ¹⁰ Rũ wũxichigũ i pemax, rũ Tupana pexna nanaxã i perũ cuèx. Rũ ngẽma perũ cuèxmaã rũ name nixĩ i wũxichigũ pegũ perũngũxèègũ, na aixcũma Tupanaãrũ ngũxèèruũ i mexũ na pixĩgũxũcèx rũ meã namaã pepuracũxũcèx i guxũma i ngẽma cuèx i Tupana pexna ãxũ. ¹¹ Rũ ngẽxguma texé nüxũ ixuxgu i ore, rũ name nixĩ i aixcũma Tupanaãrũ orexũ tixu. Rũ ngẽxguma texé togũxũ rũngũxèègu, rũ name nixĩ i Tupana tũxna ãxũ i poramaã tanaxũ. Rũ guxũma i ngẽma pexũxũ rũ name nixĩ i meãma penaxũ na ngẽmaãcũ Ngechuchu ya Cristugagu Tupanaxũ picuèxũũgũxũcèx. Erũ nüma ya Tupana rũ guxũguma namexèchi rũ naporaxũchi. Rũ ngẽmaãcũ yĩ.

Ngẽxguma Cristuaxũ yaxõxgu rũ ngũxũ tinge

¹² Pa Chaueneègũ ya Pexũ Changechaũgũxex, ñuxma na taxũ i guxchaxũgũ i perũ ngũxèèruũ pexcèx ínguxũ, rũ tãxũ i pebaixãchiãègũxũ, ñoma tacũ i taguma nüxũ pedauxũ ngupetũxũrũũ!

¹³ Natürũ narũmemaẽ nixĩ na petaègũamaxũ,

yerü yema Cristu ngúxŭ na ingexŭrŭŭ nixĩ i ngúxŭ na pingegŭxŭ i ñuxmax na petaãegŭxŭcèx i ngëxguma wena núma naxŭxgu i nümax. ¹⁴ Rŭ ngëxguma Cristuaxŭ na peyaxŭgŭxŭgagu texé pemaã guxchigagu, rŭ wŭxi i perŭ taãe nixĩ i ngëma. Erŭ ngëmaãcŭ nüxŭ pecuèx na Tupanaãe i Üünexŭ rŭ pewa na nangëxmaxŭ. ¹⁵ Rŭ ngëxguma chi ngúxŭ pingegŭgu, rŭ name nixĩ na wŭxi i mexŭ na pexŭgŭxŭgagu na yĩxŭ rŭ tama wŭxi i chixexŭgagu na yĩxŭ, ngëxgumarŭŭ i máeta rŭ éxna ngítèèx rŭ éxna togŭarŭ guxchaxŭwa na pegŭ pengëxmagŭxŭèèxŭ. ¹⁶ Natŭrŭ ngëxguma texé Cristuaxŭ tayaxŭxŭgagu ngúxŭ tingexgu, rŭ taxucèxma tŭxcŭŭ ngëmacèx taxãne. Rŭ name i ngëmacèx Tupanaxŭ ticuèxŭŭ. ¹⁷ Rŭ ñuxma rŭ marŭ nawa nangu na Tupana ngúxŭ tŭxŭ ingexëèxŭ na ngëmaãcŭ tŭxŭ iyanawëxãchixëèxŭcèx i yixema na naxãcŭgŭ ixĩgŭxŭ. Rŭ ngëxguma ngëmaãcŭ tamaã inaxŭgŭãgu, rŭ ¿ñuxãcŭ tá nüxŭ naxŭpetŭ i ngëma duŭxŭgŭ i tama Tupanaãrŭ ore i mexŭga ñnüèchaŭxŭ? ¹⁸ Erŭ Tupanaãrŭ ore i ũmatŭxŭwa rŭ ñanagŭrŭ:

“Ngëma duŭxŭgŭ i mexŭ ũgŭxŭ rŭ guxchaãcŭma nanayauxgŭ i maxŭ i taguma gúxŭ. Rŭ ñuxma na ngëmaãcŭ yĩxŭ, ¿rŭ ñuxãcŭ tá nüxŭ nangupetŭxŭ i ngëma duŭxŭgŭ i chixexŭ ũgŭxŭ rŭ pecaduãxgŭxŭ?”

ñanagŭrŭ. ¹⁹ Rŭ ngëmacèx ya yixema Tupana naxwèxexŭãcŭma ngúxŭ ingegŭxe, rŭ name nixĩ na mexŭ taxŭgŭechaxŭ rŭ Tupana ya tŭxŭ ũcŭmëxëgu na tanaxŭxŭ i tŭmaãe na nüxna tŭxŭ

nadauxcèx. Erü nüma ya Tupana rü mecü nixĩ rü taguma texéxũ nawomüxêẽ.

5

Ucuxêgü naxcèx i ngẽma yaxõgüxũ

¹ Rü ñuxmax, Pa Yaxõgüxũârü ãëxgacügüx, rü pexna chanaxãchaũ i wüxi i ucuxê i mexũ, erü choma rü ta pexrüũ yaxõgüxũârü ãëxgacü chixĩ. Rü chomaxũchima nixĩ ga nüxũ chadauxũ ga ñuxãcü ngüxũ na yangexũ ga Cristu. Rü choma rü tá ta pexrüũ choxũ nangëxma i chauchica i mexũ i ngëxguma wena núma naxũxgu. ² Rü chanaxwèxe i nüxna pedau rü nüxũ perüngüxêẽ i guxüma i Tupanaârü duũxügü i pemëxwa ngëxmagüxũ. Rü name i mexũ i perü ngüchaũmaã Tupana naxwèxexũãcüma penaxü i ngẽma puracü, rü tama texé pexũ muxguxica penaxü rü êxna dïerucèx penaxü. ³ Rü tama name i namaã penuëãcüma rü penangaãcüma penamu i ngẽma duũxügü. Natürü chanaxwèxe i mexũ i perü maxũ nüxũ pewëx na ñuxãcü Tupana naxwèxexũ na namaxëxũ. ⁴ Rü ngëxguma wena núma naxũxgu ya tórü Daurüxũchi ya Cristu, rü pema rü tá penayauxgü i wüxi i perü ãmare i ngèxcuerü i mexëchixũ i taguma ngauxũ. ⁵ Rü ngëxgumarüũ ta i pemax, Pa Ngextüxücügüx, rü name nixĩ i naga pexĩnüë i ngẽma perü ãëxgacügü i Tupanaârü puracüwa puracüexũ. Rü guxãma i pema i yaxõgüxũ, rü name nixĩ i wüxichigü pegü perüngüxêẽ rü taguma pegügu perüxĩnüë na pemücügüarü yexera pixĩgüxũ. Erü Tupanaârü ore i ümatüxüwa rü ñanagürü:

“Tupana rü tama norü me nixĩ i ngẽma duũxũgũ
 i nũgũ icuèxũxũgũxũ. Natürü nüxũ
 narüngũxẽẽ rü namaã namecũma i ngẽma
 duũxũgũ i tama nũgũ icuèxũxũgũxũ”,
 ñanagürü i ngẽma ore. ⁶ Rü ngẽmacèx tama name i
 pegü picuèxũxũ. Rü narümema i Tupanamẽxẽ
 ya poranetũxũwa pegü pengẽxmagũxẽẽ na
 nũma pexũ yacuèxũxũgũxũcèx i ngẽxguma nawa
 nanguxgu na ngẽmaãcü pemaã naxũãxũ. ⁷ Rü
 name nixĩ i Tupanamẽxẽgu penaxü i guxũma i
 perü oegaãẽgũ, erü nũma ya Tupana rü guxũguma
 pegu narüxĩnũ rü aixcũma pexna nadau. ⁸ Rü
 name nixĩ i guxũguma pegũna pedaugü rü
 ipexuãẽgũ, erü perü uwanü i Chataná rü doma
 wüxi ya ai ya idüraxüchicürüũ nanañaãne rü
 tümacèx nadau na texéxũ tá nachixexẽẽxũ. ⁹ Rü
 peporaeamèx rü peyaxõgüamèx i ngẽxguma tacü
 rü chixexũ pemaã naxüxchaũgu! Erü nüxũ pecuèx
 rü guxũma i taeneẽgü i guxũwama ngẽxmagũxũ
 rü pexrũũ ngẽmatama ngúxũ ningegü. ¹⁰ Natürü
 ngẽxguma paxaxãchi ñoma i naãnewa ngúxũ
 pingegüguwena, rü Tupana rü tá pexũ nimexẽẽ
 na aixcũma napẽxewa pimexũcèx, rü tá pexũ
 narüngũxẽẽ na taguma nüxũ perüxoexũcèx, rü
 tá pexũ naporaexẽẽ na aixcũma perü maxũwa
 peporaexũcèx. Rü daatama Tupana nixĩ ya tüxna
 naxãcü i guxũma i mexũ i tüxũ ngẽxmaxũ, rü tüxũ
 deicü na naxütawa tüxũ nangẽxmaxũcèx i tachica i
 mexũ i taguma gúxũ, erü Ngechuchu ya Cristuarü
 duũxũgũ tixĩgü. ¹¹ Rü name nixĩ i guxũguma nüxũ
 ticuèxũgũ ya Tupana, erü nũma nixĩ i guxũãrũ
 aẽxgacü yiĩxũ i guxũguma. Rü ngẽmaãcü yiĩ.

Pedru rü yema yaxõgüxüxü narümoxë

¹² Taeneë ya Chiribánu ya meã yaxõcümaã petanüwa chanamu i ñaã nuxmarexü i popera na pexü chixucuxëgüxücèx rü pemaã nüxü chixuxücèx na ngëma pexü nangechaüxügagu yïxü ya Tupana i aixcüma pexü nangüxëëxü. Rü ñuxma na ngëmaãcü pexü nangechaüxü, rü name nixi i guxüguma naxcèx pemaxë.

¹³ Rü pexü narümoxëgü i guxüma i taeneëgü i yaxõgüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëëruü i Marcu ya chaunerüü ixïcü.

¹⁴ Rü chanaxwèxe i wüxichigü i pema rü pegü pengechaügüãcüma pegü perümoxëgü. Rü ngëxgumarüü ta chanaxwèxe na aixcüma petaãëgüxü i guxãma i pema na Ngechuchu ya Cristuarü duüxügü pixigüxü. Rü ngëmaãcü yï.

Rü nuãma pexna,
Pedru

**Tupanaarü Ore i Tóru Cori ya Ngechuchu ya
Cristuchiga
New Testament in Ticuna (PE:tca:Ticuna)**

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files dated 29 Jan 2022

9d5dc22a-30be-5d26-85a9-76047f4c89e6